

THOMAS, JOHN (1736 - 1769), clericwr a hynafiaethydd;

Enw: John Thomas
Dyddiad geni: 1736
Dyddiad marw: 1769
Rhiant: Jane Rowland (née Jones)
Rhiant: Thomas Rowland
Rhyw: Gwryw
Galwedigaeth: clericwr a hynafiaethydd;
Maes gweithgaredd: Crefydd; Hanes a Diwylliant
Awdur: Helen Myfanwy Ramage

Ganwyd 22 Hydref 1736 yn Tyddyn Ysguboriau, Ynyscynhaearn, Eifionydd, yn fab i Thomas Rowland; brawd iddo oedd [Richard Thomas](#) (1750 - 1780), a nai fab chwaer oedd [Ellis Owen](#) o Gefnymeusydd. Addysgwyd ef yn Llanystumdwy, Llanegryn, Botwnnog, a'r Friars ym Mangor. Ymaelododd yn Rhydychen 20 Mawrth 1755 o Goleg Iesu, lle'r oedd [John Lloyd](#) 'o Gaerwys' yn gyfaill iddo; urddwyd ef yn Rhydychen yn 1760. Yr oedd yn 'under-keeper of the Museum' yno, ond ni allai fyw ar ei gyflog - nid am fod hwnnw'n fychan (meddai [William Morris](#) o Fôn), ond am ei fod yn yfwr trwm; felly aeth yn gurad i Gaergybi ddiwedd 1760. Ddiwedd 1761 cafodd le is-athro yn y Friars, a churadiaeth Llandygai a oedd yn cydfynd â'r swydd honno. Yn 1766, penodwyd ei beriglor yng Nghaergybi, Richard Langford, yn brifathro ysgol ramadeg Biwmares, ond aeth John Thomas yno'n ddirprwy iddo - nid manwl gywir, felly, yw'r dyb arferol i John Thomas fod yn brifathro 'r ysgol. Gyda'i swydd, daliai guradiaethau Llansadwrn a Llandegfan. Bu farw'n ddisyfyd ar ddydd Llun y Pasg (27 Mawrth) 1769, yn Castellor; claddwyd yn Llandegfan, 'yn 33 oed' - yn gywirach, yn ei 33 flwydd. Yn ôl tystiolaeth unfryd y [Morysiaid](#), [Hugh Hughes](#) 'y Bardd Coch' (a ganodd farwnad iddo), a '[Ieuan Fardd](#)', yr oedd yn ysgolhaig Cymraeg neilltuol dda, ac yn feistr ar achau; copiai hen lawysgrifau - aeth y rheini i'w frawd, [Richard](#), a chwalwyd hwy pan fu hwnnw farw; dywed [Ellis Owen](#) fod [Hugh Maurice](#) wedi defnyddio llawer ohonynt at y [The Myvyrian Archaeology of Wales](#). Ni chyhoeddwyd dim o'i waith yn ystod ei fywyd, ond dangosodd [Syr J. E. Lloyd](#) (ar dystiolaeth [John Lloyd](#) o Gaerwys a '[Gwallter Mechain](#)') mai ef bioedd yr *History of the Island of Anglesey* a gyhoeddwyd yn ddi-enw yn 1775; a chynhwysodd [William Williams](#) o Landygai waith John Thomas, 'A Genealogical Account of the Families of Penrhyn and Cochwillan,' yn ei *Observations on the Snowdon Mountains*, 1802.

Awdur

Helen Myfanwy Ramage, (1992)

Ffynonellau

J. E. Griffith, *Pedigrees of Anglesey and Carnarvonshire Families* (1914), 359

Foster, *Alumni Oxonienses*

Y Gwylidydd, 1831, 186

Y Brython, 1864, 54

John Williams, *David Hughes, M. A., and his free grammar school at Beaumaris an historical essay* (Bangor 1864)(arg. 1933), 26

The Letters of Lewis, Richard, William, and John Morris, of Anglesey, (Morrisiaid Môn) 1728-1765 (1907–9)

Hugh Owen (gol.), *Additional Letters of the Morrises of Anglesey (1735-86)* (London 1947-9)

Y Traethodydd, 1906, 309-11

Journal of the Welsh Bibliographical Society, 1920, 129-35; 1944, 110-11

Dolenni Ychwanegol

VIAF: [26967946](#)

Wikidata: [Q6260506](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

